



Sabtu, 31 Desember 2022
Ogen: JESAYA 43:18-19



NEHENLAH KEJADIN SI MBARU



Paksa-paksa i bas geluhta banci si bagi ku bas telu ruang waktu. E me masa lalu, masa kini ras masa depan. Paksa si enggo lepas, lanai bo terulihi, banci nge iinget terjeng jadi pembelajaren. Masa gundari, enda kinata, realita i bas geluhta. Si man dalanen, arus ipejuangkan asa ngasup ras gegeh alu mindo penampat Dibata. Masa depan, wari si pe pagi si langa bo tentu jadi sikerajangeta tapi jadi pengarapen gelah banci si aloken ras sinanami.

Renungenta enda nuriken kuga Dibata ngapuli bangsaNa. Kiniseran i bas pembuangan i Babil lanai man ingeten, puluh me ia i je nari. E maka niNa Dibata man bangsa enda, ulanai peinget-inget kerna erbage kejadi si nai si enggo jadi. Payo la sitik kalak si megati nginget si nai na ngenca, nginget kinisuinna saja seh maka lanai ia focus ku paksa si reh, tempa bene arapenna erkiteken kiniuin ras kiniseran si ngiket dirina.

Iangkai Dibata me si e, maka isuruhNa bangsa enda focus nandangi erbage kejadi si mbaru si nandangi ibahan Dibata. Janah paksa e pe sanga jadi me si e.

Bage me paksa enda kita ibabai ku bas kecibal ngataken bujur ma Dibata kerna wari si nderbih ras sendah janah erpengarapen maka wari si pe pagi tuhu-tuhu mbai kita ku bas geluh ras pengarapen si mbaru. Wari, tahun ras semangat si mbaru. Erbage si langa si aloken, arapen ras rencana si langa tersehi banci me si aloken. Paksa enda, wari penghujung i bas tahun 2022, enggo 365 wari sibentasi tahun enda. Pasti melala kal enggo si jadi subuk meriah ntah susah, sakit ntah sehat bage pe banci saja lit si langa erkedungen. Jadiken e jadi sekolah kegeluhen ras kiniteken. Mari sialoken tahun si mbaru, i ja Dibata erpadan mereken erbage si mbaru guna sinanami. Janah tetap sikataken bujur i bas kerina perbahanenNa e.